

Mireille Sint Jago ta encurasha mas autor Arubiano pa presenta nan bukinan

TUR diahuebs atardi tin un actividad educativo pa mucha na Biblioteca Nacional (BN), caminda autornan ta bin presenta nan buki na un grupo di mucha. Siman pasa señora Mireille Sint Jago a bishita BN pa di dos biaha y a duna un tremendo presentacion. Sra. Sint Jago a skirbi tres buki na Papiamentu p'e edad di 6-10 aña cu a wordo publica na 2014 pa Departamento di Enseñansa como parti di e proyecto piloto Scol Multilingual. Na november Sra. Sint Jago a presenta e buki: 'Bombero riba bais' na BN y durante su di dos bishita na BN autor Sint Jago a presenta e buki: 'Profesor Luciano'.



BUKI HENTER NA RIMA

E grupo di hobennan presente, pero tambe e representantenan di BN presente, a keda hopi encanta cu e presentacion alegre y interactivo di Juf. Mireille. Juf Mireille a priminti di bin bek pa un di tres biaha pa presenta su buki: 'Fiesta di Awa', cu ta un buki di mas cu 30 pagina y skirbi ful na rima. Sint Jago a splica cu como hoben e tabata gusta e musica di rap. E mes tabata skirbi su propio raps y canta tambe. Tempo su yiunan tabata mas chikito e tabata lesa bukinan di Annie M. G. Schmidt pa nan. Un autor Hulandes masha conoci pa su bukinan di 'Jip en Janneke' y hopi buki na rima. Awor e talento pa rap y su amor pa poema el a hinca den e buki 'Fiesta di Awa'. Un buki cu ta splica na un manera comico con 3 amiga ta haya sa mas di nos sistema di limpieza di awa sushi. Eynan e educadora, sra. Sint Jago su profesion ta maestro di chimica, a haya un oportunidad pa sali. "Mi ta purba pa no hinca hopi les den mi bukinan, pasobra e mayoria di muchanan lo kier lesa algo cu ta stimula nan fantasia. E storia aki ta combina fantasia cu e tecnica basico di nos sistema di limpieza di awa sushi.

PROMOVE NOS IDIOMA PAPIAMENTU

Mireille Sint Jago, conoci p'e programa di television educativo di antes: TV-Teach; WakPaBoSifia! pero tambe un candidata riba lista di partido MEP, actualmente ta studia Ley na Universidad di Aruba y p'e motibo ey el a splica cu aworaki e ta concentra mas tanto riba presentacion di su bukinan y cu e no a cuminsa skirbi mas buki ainda. "Mi tin hopi idea pa mi siguiente bukinan, pero mi ta druk cu mi estudio. P'esey mi kier concentra solamente riba promocion di e bukinan y tambe nos idioma Papiamentu."

Pronto Sint Jago lo presenta su bukinan na scolnan basico cu ta interesa pa haya un bishita di e autor y educador sra. Mireille Sint Jago. "Tur scol basico na Aruba a ricibi e pakete di 36 buki skirbi pa Autornan Rubiano di e proyecto Scol Multi Lingual na 2014. "Mi ta spera cu BN y e scolnan lo invita mas autor di Aruba pa bin presenta nan bukinan voluntariamente pa nos muchanan. Tin hopi mucha cu tambe tin e talento pa ta un autor den nan.", Sint Jago ta clausura. Por tuma contact cu Sint Jago via e medianan social pa haya mas informacion.





Continuacion di Pagina 8

Bon Dia Aruba, a puntra sra. Maya con e acogida ta, e ta conta cu algun 20 mucha a inscribi pero algun 10 so presenta cual el a haya un poco fastioso mirando cu hopi mucha mas kier a bin pero e cupo tabata limita. "E muchanan a yega e prome mainta cu nan cara manera, ay ta weekend pakico mi mester ta akinan. Pero despues nan a bira hopi contento y awo nan ta tristo cu e programa a caba. Nan ta papia di negoshi, di inversion, di habito nan di hende rico, habito di hende pover etc. E muchanan aki ta super sabi, ora nan a yega e prome dia bisando cosnan manera: mi kier ta miyonario, mi kier un ferrari etc. Y a medida cu nan a sigui e camp nan mentalidad a cambia y e siguiente dia, nan a bisa cosnan manera: 'uhm, bosa mi ta kere miho mi bira un inversionista, mi kier yuda hende'. Sra. Maya ta comenta. Tambe e ta bisa cu lo cual mas a sorprende su persona ta e concepto di duna les na muchanan ya cu e ta asina custuma na duna les y presentacionnan na aduhtonan. Cu mucha e ta un reto, pero e ta siña asina hopi cos su mes ya cu e programa ta asina extenso.

Circulo vicioso

Pa sra. Maya ta hopi importante pa dreña e scolnan y haci esaki accesibel na tur mucha. E ta conta Bon Dia Aruba, cu e tabata studia hopi di cerca e muchanan cu a bin e camp y manera el a spera, mayoria ta muchanan cu tin mayornan cu ya caba tin profesionnan den managment y ta studia etc. Y mientras esaki ta algo bon, locual di berdad e kier ta



yega mas cerca na muchanan di famianan di menos entrada pa asina nan por siña educacion financiero y kibra e circulo vicioso. Otro cos tambe cu sra. Maya a tuma nota di dje ta con confortabel e muchanan ta cu e les na Ingles. E intencion tabata cu sra. Donatti lo bin duna esaki y sra. Maya lo traduci, pero e muchanan no tabata tin problema algun cu e idioma. "Nos a dicidi di laga esaki na Ingles, mirando cu con cu bay bin e ta un vak na scol. E ta bira un ayudo extra pa nan cu nan curriculum", Sra. Maya ta bisa.

Escogencia

Bon Dia Aruba, a puntra sra Maya si tin algo cu e ta considerando cambia pa e siman cu ta bin. E ta splica cu no, cu e ta sumamente contento cu e programa y e ta agradecido cu el a pasa 5 aña ta haci estudio pa haya un programa di educacion financiero cu lo ta apropiado pa muchanan di e isla. "Ainda mi ta haciendo mas estudio pa wak otro programanan. Pero mi ta kere

mi lo kier keda cu esaki. E no ta laf, e ta hopi completo. E ta hopi diferente di e manera di duna les na scolnan. E ta hopi interactivo, ma scoge

esaki pa e region paso nos ta bay expande pa mas isla tambe. Tin ora hende ta busca cos riba internet y tur hende ta kere nan tin e miho pro-

grama, pues bo mester busca tur rond di mundo y analisa esaki. Por ta nos lo cambia y improvisa, dependiendo di e edadnan. Pero nos ta contento." Sra. Maya ta bisa. □